

3. Atxikitzailleak edo kontura ordaintzera behartutakoak atxikipenen edo konturako ordainketen ziurtagiria eman beharko dio zergadunari, eta behar den frogagiria ere luzatuko dio aurreko apartatuan aipatzen den urteko laburpenean hari buruz sartu behar diren gainerako datuak azalduz.

Ziurtagiri horiek zerga honen autolikidazioa aurkezteko epea hasi baino lehen jarri beharko dira zergadunaren esku.

Aurreko paragrafoetan ezarritako betebeharrak lurralde espainiarrean helbideratuta dauden, bertan egoitza duten edo han ordezkaturik dauden entitateek izango dituzte, baldin eta atxikipenari lotuta dauden errentak besteren kontura ordaintzen badituzte edo baloreen errentak gordailatu edo kobratzeaz arduratzen badira.

4. Ordaintzaileek errentak ordaintzerakoan egindako atxikipenen edo konturako sarreraren berri eman beharko diete zergadunari, aplikatu den portzentajea adieraziz.

5. Artikulu honetan aipatzen diren aitorten eta ziurtagiriak zein eredutan, non eta nola egingo diren Ogasuneko eta Finantzetako foru diputatuak erabakiko du errenta mota bakoitzerako, eta berak ere ezarri ahal izango du aurreko 2. apartatuan jasotako datuen artean aitorten sartzekoak direnak. Atxikitzailleak edo kontura ordaintzera behartutakoak derrigorrez bete beharko ditu aitorten berari buruz eskatzen diren datuak.

Ogasuneko eta Finantzetako foru diputatuak erabakitako moduan, tokian eta epeetan aitortu eta ordaindu beharko da.

Era berean, Ogasuneko eta Finantzetako foru diputatuak erabakiko du zein kasu eta baldintzetan nahiz non, nola eta zein epean aitortu eta ordainduko diren artikulu honetan aipatutako aitorten telematikakoak eta ziurtagiriak.

V. kapitulua: ordainketa zatikatuak.

127. artikulua. Ordainketa zatikatuak egitera behartuak.

1. Jarduera ekonomikoak burutzen dituzten zergadunek hurrengo artikuluetan ezarritakotik ateratzen den diru-kopurua autolikidatu eta Foru Aldundiari ordaindu behar diote, Pertsona Fisikoen Errentaren gaineko Zergaren konturako ordainketa gisa.

2. Aurreko apartatuan xedatutakoa xedatuta ere, nekazaritza, abeltzaintza edo baso jarduerak burutzen dituzten zergadunak ez dira jarduera horiengatik ordainketa zatikatuak egitera beharturik egongo baldin eta, aurreko urte naturalean jardueratik lortutako sarreraren gutxienez %70ari atxikipena edo konturako sarreraren bat aplikatu bazaio. Diru laguntza arruntak, kapital diru laguntzak eta kalte-ordainak kanpoan utziko dira.

3. Aurreko 1. apartatuan ezarritakoaren kaltetan gabe, jarduera profesionalak burutzen dituzten zergadunak ez dira jarduera horiengatik ordainketa zatikatuak egitera beharturik egongo baldin eta, aurreko urte naturalean jardueratik lortutako sarreraren gutxienez %50ari atxikipen edo konturako sarreraren bat aplikatu bazaio.

4. Aurreko 2. eta 3. apartatuetan xedatutakoaren ondorioetarako, jarduerari hasiera ematen zaion kasuetan, ordainketa zatikatuaren epealdian atxiki edo kontura ordaindu diren sarreren portzentajea hartuko da kontuan.

128. artikulua. Ordainketa zatikatuaren zenbatekoa izaera orokorreaz.

1. Aurreko artikuluan aipatutako zergadunek ondoko diru-sarrera egingo dute, izaera orokorreaz eta hiru hilabetetan behin, etekin garbia kalkulatzeko zuzeneko zenbatespena nahiz zenbatespen objektiboa erabiltzen duten jarduerengatik: ordainketa zatikatuak egin baino bi urte lehenago lortutako etekin enpresarial edo profesional garbiei %5 aplikatuz ateratzen den emaitza. %5 horri, hala ere, indarrean dagoen araudiari jarraituz bi urte lehenago egindako atxikipenen eta konturako sarreren laurdena kenduko zaio, hala badagokio.

Etekin garbia zeinu, indize edo moduluen modalitatearen arabera kalkulatzeko duten jarduerengatik aurreko paragrafoan ezarritakotik ateratzen denaren erdia ordainduko da, baldin eta azken aurreko urtean titularra pertsona fisikoa izan bada eta soldatapeko langilerik izan ez badu.

Ordainketa zatikatuaren zenbatekoa inoiz ezingo da negatiboa izan.

2. Zergadunek adierazitakoa baino portzentajea handiagoa aplikatu ahal izango dute ordainketa zatikatu bakoitzean.

3. Ogasuneko eta Finantzetako foru diputatuak prozedura bat ezarri ahal izango du Administrazioak ofizioz likidatu ahal izan ditzan ordainketa zatikatuak.

129. artikulua. Ordainketa zatikatuaren zenbatekoa zuzeneko zenbatespenean, aparteko egoerak daudenean.

1. Denboraldiko jardueretan, jarduera hasi edo aldatzen denean, ordainketa zatikatuak egin baino bi urte lehenago jarduerarik garatu ez denean edo jarduera horietatik lortutako etekin garbia positiboa izan ez denean, edota, bestela, hiru hileko batean izandako eragiketa bolumena bi urte lehenagoko hiru hileko korrelatiboan izandako bolumen osoa baino txikiagoa denean, zergadunak hiru hileko horretako eragiketa bolumenaren %2a ordaindu ahal izango du etekin garbia zuzeneko zenbatespenaren arabera kalkulatzeko duten jarduerengatik. Saltoki orokor, berezi nahiz barrukoetan tabako laboreak handizka zein txikizka saltzen direnean, portzentajea hori hiru hilekoan izandako salmenta edo sarrera bolumenaren %1 izango da.

2. Aurreko paragrafoan xedatutakoaren arabera ateratzen den zenbatekoari kendu beharrekoak izango dira, hala badagokio, erregelamendu honek 114. eta 123. artikuluetan ezarritakoari jarraikiz egindako atxikipenak eta konturako sarrerak, hiru hilekoari dagozkionak.

3. Zergadunek adierazitakoa baino portzentajea handiagoa aplikatu ahal izango dute ordainketa zatikatu bakoitzean.

130. artikulua. Ordainketa zatikatuaren zenbatekoa zeinu, indize edo moduluen modalitatean, tartean aparteko egoerak daudenean, nekazaritza, abeltzaintza arrantza jarduerak kanpoan utzita.

1. Denboraldiko jardueretan, jarduera hasi edo aldatzen denean, ordainketa zatikatuak egin baino bi urte lehenago jarduerarik garatu ez denean edo jarduera horietatik lortutako etekin garbia positiboa izan ez denean, etekin garbia kalkulatzeko zeinu, indize edo moduluen modalitatea erabiltzen duten jarduerengatik zergadunak salbuespen gisa egingo dituen diru-sarrerak hurrengo apartatuetan zehaztutakoak izango dira.

2. Hiruhileko ordainketa bakoitza soldatapekoa ez den langilearen modulua bakarrik aplikatuz ateratzen den zenbatekoaren %5 izango da. Modulu hori kalkulatzeko, zerga honen zeinu, indize edo moduluak aplikatzeko Ogasuneko eta Finantzetako foru diputatuak foru agindu bidez ekitaldi bakoitzerako onartzen dituen instrukzioetan jasotakoari jarraituko zaio.

Ordainketa zatikatuaren ondorio hutsetarako, aurreko paragrafoan adierazitako oinarri-daturen zenbatekoa 2rekin zatituko da jardueraren titularra pertsona fisikoa denean eta soldatapeko langilerik ez duenean.

Apartatu honetan aipatzen den ordainketa zatikatuaren ondorio hutsetarako, ezingo da inolako indize zuzentzailerik aplikatu.

Soldapatekoa ez den langilearen modulua zenbaki oso bat ez bada, bi zenbaki dezimalekin adieraziko da.

3. Jarduera bat urtarilaren 1az geroztik hasten bada edo abenduaren 31 baino lehen amaitzen, edo bi zirkunstantziak batera ematen direnean, osatu gabeko hiruhileko naturalean egin behar den ordainketa zatikatua eragiketa honen emaitza izango da: lehenik, hiruhileko natural oso bati dagokion zenbatekoa -aurreko 2. apartatuan xedatutakoaren arabera kalkulatua- hartuko da, eta gero, hiruhileko natural horretan jarduera garatu den egun naturalen kopurua hiruhileko horretako egun naturalen kopuru osoarekin zatituko da; hiruhileko natural osoari dagokion zenbatekoa zatiketa horren emaitzarekin biderkatuz lortuko da, azkenik, ordainketa zatikatuaren zenbatekoa.

Jarduera hasten den egunean oinarri-daturik zehazterik ez badago, ordainketa zatikatua hiruhilekoan izandako salmenta edo sarrera bolumenaren %2 izango da.

4. Denboraldiko jardueretan ordaindu behar den zenbatekoa kalkulatzeko, eragiketa haxe egingo da: hiruhilekoan zehar jarduera zenbat egun naturaletan garatu den jakinda, egun kopuru hori hiruhileko horretako egun naturalen kopuruarekin zatituko da, eta ateratzen den zatidura aurreko 2. apartatutik ateratzen den zenbatekoarekin biderkatuko da.

5. Aurreko 2., 3. eta 4. apartatuetan xedatutakoaren arabera ateratzen den zenbatekotik kendu beharrekoak izango dira, hala badagokio, erregelamendu honek 114. eta 123. artikuluetan ezarritakoari jarraituta egindako atxikipenak eta konturako sarrerak, hiruhilekoari dagozkionak.

131. artikulua. Ordainketa zatikatuaren zenbatekoa zeinu, indize edo moduluen modalitatean, nekazaritza, abeltzaintza eta arrantza jardueretan, aparteko egoerak daudenean.

1. Denboraldiko jardueretan, jarduera hasi edo aldatzen denean, ordainketa zatikatuak egin baino bi urte lehenago jarduerarik garatu ez denean edo jarduera horietatik lortutako etekin garbia positiboa izan ez denean, salbuespen gisa, etekin garbia kalkulatzeko zeinu, indize edo moduluen modalitatea erabiltzen duten nekazaritza, abeltzaintza eta arrantza jarduerengatik zergadunak egingo dituen diru sarrerak hurrengo apartatueta zehaztutakoak izango dira.

2. Hasiera batean aplikatuko diren zeinu edo moduluak eta indize zuzentzaileak, jardueraren oinarri-datuei dagozkienak izango dira, beti ere, urte bakoitzeko urtarilaren 1a erreferentzia harturik.

Oinarri-daturen bat urteko lehen egunean zehazterik ez dagoenean, aurreko urteari dagokiona hartuko da ordainketa zatikatuaren ondorioetarako.

Denboraldiko jarduerak badira, aurreko urteari dagokion modulu unitate kopurua hartuko da ordainketa zatikatuaren ondorioetarako.

Aurreko urtean ez bada jardueran aritu, hasiera batean aplikatuko diren indize edo moduluak eta indize zuzentzaileak, hasiera eguneko oinarri-datuei dagozkienak izango dira.

Ordainketa zatikatuaren ondorio soilotarako, aurreko paragrafoetan adierazitako oinarri-daturen zenbatekoa 2rekin zatituko da jardueraren titularra pertsona fisikoa denean eta soldatapeko langilerik ez duenean.

Zeinu edo modulu bakoitzeko oinarri-datuak zenbaki oso bat ez badira, bi zenbaki dezimalekin adieraziko dira.

3. Hiruhileko ordainketa bakoitza jardueraren zeinu, indize edo moduluak aplikatuz ateratzen diren etekin garbien %5 izango da, betiere aurreko 2. apartatuan ezarritakoaren arabera.

Nekazari gazteen kasuan edo soldatapeko nekazariak direnean, dagokien hiruhileko ordainketa kalkulatzeko, zerga honen zeinu, indize edo moduluak aplikatzeko Ogasuneko eta Finantzetako diputatuak foru agindu bidez ekitaldi bakoitzerako onartzen dituen instrukzioetan kolektibo horrentzat jasoko den murrizpena aplikatuko da.

Oinarri-daturik ezin bada zehaztu aurreko 2. apartatuan ezarritakoaren arabera, ordainketa zatikatua hiruhilekoan izandako salmenta edo sarrera bolumenaren %2koa izango da.

4. Jarduera bat urtarilaren 1az geroztik hasten bada edo abenduaren 31 baino lehen amaitzen, edo bi zirkunstantziak batera ematen direnean, etekin garbia, ordainketa zatikatuaren ondorioetarako, honako modu honetan kalkulatu da:

1.- Etekin garbia dagokion jarduerari aurreko 2. apartatuan ezarritakoaren arabera zeinu, indize edo moduluak aplikatuz kalkulatu da.

2.- Jardueran aritutako hiruhileko natural oso bakoitzeko, etekin garbiaren %5 ordainduko da.

3.- Osatu gabeko hiruhileko naturalean ordaindu behar den zenbatekoa honela kalkulatu da: lehenik, hiruhileko natural oso bati dagokion zenbatekoa hartuko da, eta gero, hiruhileko natural horretan jarduera garatu den egun naturalen kopurua hiruhileko horretako egun naturalen kopuru osoarekin zatituko da; hiruhileko natural osoari dagokion zenbatekoa zatiketa horren emaitzarekin biderkatuz lortuko da, azkenik, ordainketa zatikatuaren zenbatekoa.

Jarduera hasten den egunean oinarri-daturik zehazterik ez badago, ordainketa zatikatua hiruhilekoan izandako salmenta edo sarrera bolumenaren %2 izango da.

5. Denboraldiko jarduerak badira, urteko etekin garbia aurreko 2. apartatuan xedatutakoari jarraikiz kalkulatu da ordainketa zatikatuaren ondorioetarako.

Eguneko etekina, urteko etekina aurreko urtean jardueran aritu den egun kopuruarekin zatituz kalkulatu da.

Zenbaki honetan aipatutako jardueretan, hiruhileko natural bakoitzagatik egin beharreko sarrera honela kalkulatu da: lehenik, aipatu hiruhilekoan jarduera zenbat egun naturaletan garatu den jakin behar da, eta gero, kopuru hori eguneko etekinarekin biderkatu. Emaitzaren %5 izango da ordaindu beharreko sarrera.

6. Aurreko 3., 4. eta 5. apartatuetan xedatutakoaren arabera ateratzen den zenbatekotik kendu beharrekoak izango dira, hala badagokio, erregelamendu honek 114. eta 123. artikuluetan ezarritakoari jarraikiz atxikipenak eta konturako sarrerak, hiruhilekoari dagozkionak.

132. artikulua. Aitortzea eta ordaintzea.

1. Enpresari eta profesionalek derrigorrez aitortu eta ordaindu beharko dizkiote hiru hilabetetan behin Foru Aldundiari kapitulu honetako aurreko artikuluen arabera zehaztutako zenbatekoak. Horretarako epea apiril, uztail, urri eta urtarrilaren 1ean hasiko da eta hurrengo hilaren 10ean amaituko.

Kapitulu honetako aurreko artikuluan xedatutakoa aplikatu arren ordaintzeko zenbatekorik ateratzen ez denean, zergadunek ez dute aitorpenik aurkeztu beharko.

2. Ogasuneko eta Finantzetako foru diputatuak artikulua honetan aipatzen diren epeak luzatu ahal izango ditu, eta baita sei hilabetetan behin ordaintzeko aukera eman ere. Horretarako, alabaina, beharrezkoa izango da aurreko artikuluan adierazitako portzentajeetan bidezko egokipenak egitea.

3. Zergadunek Ogasun eta Finantza Departamentuan aurkeztuko dituzte aitorpenak, eta diru sarrera Gipuzkoako Foru Aldundian egingo dute.

Aitorpenak bat etorriko dira ezarrita dauden baldintza eta eskakizunekin, eta diru-sarrera Ogasuneko eta Finantzetako foru diputatuak erabakiko duen tokian eta eran egingo da.

133. artikulua. Errentak egozteko erregimenean dauden entitateak.